

INUIT ATAQATIGIIT

Inatsisartuni



UKA2020/195
21. okt. 2020
Mariane Paviasen

**Illersornissaqarfiup sulisui pillugit inatsisip allangorneranut inatsisit
aalajangersimasut Kalaallit Nunaannut atuutilernissaat pillugit kunngip
peqqussutaatigut atuutilersinneqarnissaa Namminersorlutik Oqartussat
akuersaarsinissaat pillugu Inatsisartut aalajangiiffigisassaat**

(Nunanut Allanut Nukissiuteqarnermullu Naalakkersuisoq)

Inuit Ataqatigiinniit Peqqussummut missingiummi illersornissaqarfiup sulisui pillugit inatsimmi allannguutit marluk ataatsimoortinneqartunut peqqussummullu ataatsimoortillugit Kalaallit Nunaannut atuutilersinnissaat kissaatigineqartumut ima oqaasissaqarpugut.

Peqqussummi siullermi atuutilersinneqartussatut siunnersuutigineqartoq tassaavoq illersornissaqarfimmi sulisut 14. aug. 1996-i sioqqullugu aallartitaasimasut aallartitaanermi nalaanni toqukkut qimagussimasut ilaquataannut imaluunniit aallartitaasimasut aallartitaasimanermi nalaanni kinguneraniluunniit ersittumik ersinngitsumilluunniit anniaateqalersimanerani ikiorsiissutaasartut assigiinngitsumik annertussusilikkamik ullumikkut taarsiisoqartarsimanera, siunnersuummi assigiimmik pineqalernissamik aqqutissiunneqarnera, siunnersuummilu illersornissaq pillugu isumaqatigiisummi 2018-miit 2023-mut atuuttumut anguniakkat ilagaat.

Inuit Ataqatigiinniit qangaaniilli inuit assigiimmik pineqarnissaannik sulissuteqarluta partiunerput ilisarnaatitta ilagaat, taamaammat maanna namminersulivikkiartornitta ingerlanerani siunnersuutip suliarineqalernera isumaqatigaarput anguniartuassallugulu, suliat assigiit pisinnaatitaaffiit assigiit, taakkuupput namminersulernissatsinnut aqqutissat ileqquliuteriigassagut pitsaasutut isigisariaqartut.

14. aug. 1996-i sioqqullugu nammineq piu massusertik pisinnaatitaaffitillu aallaavigalugu illersornissaqarfimmi sulisuusimasunut tunngatillugu naalagaaffeqatigiinnerup iluaniittut assigiinngitsumik pisinnaatitaaffeqartinneqarsimanerat, ukiorpannilu Inuit Ataqatigiinniit sakkutuujusimasunut nunatsinni najugaqartut pitsaannerusumik ikiorserneqarsinnaalernissaat pisinnaatitaaffeqalernissaat sulissutigineqarsimasoq assigiimmik pisinnaatitaaffeqalernissaannik siunertaqartumik siunnersuuteqarnek iluarisimaarparput.

Siunnersuummi aappaattut aalajangiiffiqequsaasoq ima paasinarmat sorsuttoqassagaluarpat ajornartoortoqassagaluarpalluunniit illersornissaqarfiup sakkutuutut ilinniagaqareernerup kingorna sakkutuutut upalungaarsimasuni kiffartuussinissamut aggersarneqarsinnaasunngortinneqarnissaat nunatsinnut aamma eqqunneqassasoq.

Tassani ilisimavarput inuit namminneq kiffaanngissusertik naapertorlugu sakkutuutut ilinniagaqarumallutik qinnuteqartartut, taamaattumillu aamma siunissami ilisimagaat sakkutuutut piumaffigineqarsinnaanertik ukiuni tallimani sorsuffinnut imaluunniit ajunaarnersuaqartillugu suligasuartussanngorlutik aggersarneqarsinnaanertik piareersimaffigissallugu.

Erseqqissaatigissavara Inuit Ataqtigiinniit, ukiorpanngulersuni sakkutuujusimasut pisinnaatitaaffiinik pitsaanerusunik atugassaqtitsisoqalernissaa siunertarigatsigu, assersuutiglugu pinasuartumik tarnip pissusaanik ilisimasalinnik ikiorserneqartarnissaat anguniarlugu sulissuteqarnikuusimanerput maanna angujartuaarneqalersoq nuannaarutigigatsigu.

Nuummi kisimi sakkutuujusimasut cafeqarnerat nalungilarput, suliniuteqarsimasullu taakku assut nersorusuppagut, innersuussutigarpulli nunatta sinnerani periarfissamik taamaattunik aallartitsioqarsinnaanera eqqarsaatigineqartariaqartoq, massakkummi sakkutuujusimasut nunatsinni najugaqartut 100-sinnerpaat, , kisitsillu eqqortut pigineqalernissaat anguniarlugu misissuisoqartariarpoq ikiorsiivigineqartariaqartut qanoq amerlatiginersut ersarinnerulertussaammat.

Assigiimmik pisinnaatitaaffeqalernissaq eqqunneqarniarmat siunnersuut akuersaarparput, . Isumaliutissiissutigerusunnarporli maanna nunatsinniit piumassusertik naapertorlugu illersornissaqarfiup iluani ilinniarsimasut nunatta iluani sillimaniarnernut, nakkutilliinernut, annaasiniarnernut, mingutsaaliuinermit atorluarneqarsinnaanerat aqqutissiuunneqarumaartoq, taamaaliornikkut sorsuffiusunut nunaqqatitsinniit aallartitsisoqannginnissaa anguniarneqarsinnaammat.

Taama oqaaseqarluta Inuit Ataqtigiinniit eqqarsaatissiissutit misissugassatullu eqqaasagut ataatsimiititalianut susassaqtunit suliarineqarnissaat anguniarlugu ingerlateqqippagut.